

## Benigne Lector,

**N**on fabulam confictam exhibeo, sed rei verè gestæ veram & genuinam Historiam, cujus argumentum & partes singulas habeo partim ex relatu Magnatum, aliorumq; Testium oculatorum, partim ex A. Senatus Rigensis eleganti Epistolâ Historico = Apologeticâ ad Illustriss. Principem Radzivilium; quam quidem ante triennium editam hætenus silentio suo comprobarunt ipsi Poloni. Quæ alicubi ad ornatum Poëticum, de more, conficta occurrunt, ea ejusmodi sunt, ut noxam nemini adferant, & à prudenti Lectore facile discerni possint ab iis quæ rei substantiam concernunt. Maronem, qui mihi unus instar omnium Poëtarum est in hoc carminis genere, præ aliis imitatione pro viribus exprimendum mihi proposui, utinam tam feliciter, quàm studiosè. In materiâ certè carminis, adjumento mihi præstito, Marone quodammodo felicior fui. Volens quippe Maro, in gratiam Romanorum, mirum in modum laudibus efferre virtutes bellicas Æneæ sui, finxit operosè, non minus quam prudenter, Turnum, Æneæ Adversarium, Heroem singularis magnanimitatis & industriæ; ut victor tanti Adversarii, Æneas tanto major esset in animo Lectoris creduli. Mihi verò, virtutes magni REGIS GUSTAVI ADOLPHI, pro modulo meo, aliis in exemplum cantaturo, opus non fuit, in Hoste magnum aliquid confingere, sed, ultrò revera sese obtulit in RIGENSIBVS insignis fortitudo atq; industria, à cujus victoriâ non exigua portio laudum Regiarum cumulo accessit; ut non abs re Rigensibus jam devictis REX dixerit, illam duntaxat fidem à Civitate istâ se expetere, quam Polono toto obsidionis tempore præstitisset. Hic ut REX voti æquissimi compos fiat, & in ollis Ægyptiis mercimoniorum Polonicorum contemnendis fortiter Cives perseverent, in commune bonum opto & voveo: Præsertim quùm paternum REGIS animum experiantur indies, non tantum Sacrorum ac Prævilegiorum fideli conservatione, sed & nuperâ donatione immunitatis à Vectigalibus totius Regni aliisq; signis indubitatis. Vale, Benigne Lector, & opusculum hoc per otium evolvens virtutes præclaras, tum bellicas, tum Christianas, exemplo non uno disce, ac pro ratione muneris feliciter imitare. Rigæ Livonum Kal. Decembris CIO. ID. C. XXV.

IOANNES NARSSIUS Med. D.

RIGA